

TEZĂUR LITURGIC

8 MAI

ACATISTUL SF. APOSTOL ȘI EVANGHELIST IOAN TEOLOGUL II



MOSCOVA, 2000



Акафист

СВЯТОМУ АПОСТОЛУ И

ЕВАНГЕЛИСТУ ИОАННУ БОГОСЛОВУ

Кондак 1

Избранный от мрежей рыбарских на проповедь Евангелиа, и от ловли рыб на уловление человеков во свет истинного боговедения, о великий Апостоле, учениче, друже и наперснике Христов, моли Единого Истинного Человеколюбца, Егоже ты серафимскою любовью возлюбил еси, да помилует нас, ищущих твоего к Нему предстательства, и зовущих ти:

Радуйся, Иоанне Апостоле, наперснике Христов и Богослове.

Икос 1

Ангельских сил и всякия твари Творца, Владыку и Господа, восприемшаго плоть нашу, и являшагося на земли спасения нашего ради, узрев ходящего при мори Галилейстем, и зывающего тя с братом твоим, Иоанне блаженне, в звание апостольства, оставль мрежи рыбарския и отца твоего в корабли, неуклонно оттоле последовал еси стопам Спасителевым.

Сего ради вопием ти сие:

Радуйся, мрежею Христовою уловленный.

Радуйся, воистинуловец человеков явивыйся.

Радуйся, дом свой и родителей ради Господа оставивый.

Радуйся, мир и вся его прелести презревший.

Радуйся, чистоты и целомудрия дивный хранителю.

Радуйся, Христом Богом возлюбленный.

Радуйся, избранный и верный Христов учениче.

Радуйся, собору апостольскому сопричтенный.

Радуйся, истины Царствия Божия уразумевый.

Радуйся, тайнозрителю судеб Божиих.

Радуйся, небесный Ангеле, во образе земного человека явивыйся.

Радуйся, апостолом любви нареченный.

Радуйся, Иоанне Апостоле, наперснике Христов и Богослове.

Кондак 2

Видя Христос Господь непорочную чистоту твоего сердца, плотскими страстями не омраченную, суди тебе достойна быти зрения таинственных откровений, имиже проникая во глубину богословия, возможеша проповедати оное во услышание всего мира и сего ради нарече тя сына Громова. Ты же не возврати последовал еси Христу, непрестанно поя Ему: Аллилуиа.

Икос 2

Разумом истинного богопознания озаряя твою душу, шествовал еси по благом Учителе твоём, учася из уст Его исходящей премудрости, и ради совершенного твоего незлобия, и девственного целомудрия, был еси возлюблен Христом Господем твоим. Услыши убо нас, воспевающих ти сице:

Радуйся, вместилище благодатныя силы Божия.

Радуйся, премудрости Божия проповедниче.

Радуйся, ум божественный стяжавый.

Радуйся, Христово Евангелие нам оставивый.

Радуйся, тобою бо Дух Святой дарова словеса спасения.

Радуйся, яко писании твоими тайны веры нам открываеши.

Радуйся, свет божественного учения в сердце своем носивый.

Радуйся, яко и нас тем же светом озаряеши.

Радуйся, семя слова Божия в сердца многих людей всеявый.

Радуйся, к познанию истинныя веры тех наставивый.

Радуйся, всю вселенную богословием твоим просветивый.

Радуйся, яко Церковь Христова Богослова тя нарече.

Радуйся, Иоанне Апостоле, наперснике Христов и Богослове.

Кондак 3

Силу Божества Христова, сокрытую под облаком немощнаго человеческого естества, познал еси явно, егда воскрешаяй дочь Иаинову, и потом преображаяйся на Фаворе, сподоби тя со иными двема токмо ученики свидетели быти таковых преславных чудес. Познав же Христа Бога истиннаго, из глубины сердца твоего воззвал еси Ему: Аллилуиа.

Икос 3

Имея велие дерзновение к возлюбившему тя Христу, Сыну Божию, возлегал еси на персех Его при совершении тайныя вечери, и егда прорече Господь о предатели Своем, тогда един ты дерзнул еси вопрошити о имени того. Сего ради вопием ти:

Радуйся, возлюбленным учеником от Господа нареченный.

Радуйся, присный Его друже.

Радуйся, во взаимней братстей любви с иными апостолы поживый.

Радуйся, на непоколебимом камени заповедей Христовых утвердивыйся.

Радуйся, невозбранно на персех Господних почивый.

Радуйся, дерзновенно о тайне предательства
вопросивый.

Радуйся, воплотившемуся Богу Слову верно
послуживый.

Радуйся, даров великих от Него сподобивыйся.

Радуйся, разум небесный приемый.

Радуйся, светом добродетелей твоих Бога
прославивый.

Радуйся, светильниче сущым во тьме и сени
смертней.

Радуйся, закон любви Божия на скрижалях
сердец наших написавый.

Радуйся, Иоанне Апостоле, наперсниче Христов
и Богослове.

Кондак 4

Буря ярости и зверскаго неистовства
жестокосердных и неблагодарных иудеев
пригвозди ко Кресту Христа Бога, волею
пострадати за вся люди изволившаго, тогда вси
ученицы Его, страхом объяти бывше, бежаша;
но ты, апостоле всехвальный, питая к Нему
любовь множайшую паче иных, на вся муки
Христовы взирая, у Креста пребыл еси
неотступно, сердечно состражда Деве, Матери
Божией, плачущей и рыдающей, и удивляясь
крайнему милосердию и долготерпению Божию,
взывал еси к Пострадавшему за род
человеческий: Аллилуиа.

Икос 4

Слышав Апостол Иоанн Божественный глас Господа к Матери Своей, при Кресте с тобою стоящей: «Жено, се сын твой», и тебе паки: «Се Мати твоя», повеление Владыки и Бога своего исполняя, послужил еси тайне всыновления Божией Матери чрез тебе всех верующих во Христа. Мы же, на Великую Заступницу и Матерь Света все упование возлагающе, вопием тебе, Апостоле, таковой тайне послужившему: Радуйся, усыновления Божия Матере сподобивыйся.

Радуйся, хранить Ю в жизни земней призванный.

Радуйся, пред Крестом Спасителя до конца предстоявый.

Радуйся, верность Господу до смерти сохранивый.

Радуйся, Божиею Материю возлюбленный.

Радуйся, благоговейный Ея служителю.

Радуйся, Пресвятая Девы Богородицы сомолитвенниче.

Радуйся, воли Ея святые исполнителю.

Радуйся, во успении ко гробу честное и святое Ея тело проводивый.

Радуйся, с блистающею райскою ветвию, Архангелом Гавриилом принесенною, одру Ея предшедый.

Радуйся, пред Пречистою Девею Марию
верный наш ходатаю.

Радуйся, яко с Нею у престола Христова о нас
умоляеши.

Радуйся, Иоанне Апостоле, наперснике Христов
и Богослове.

Кондак 5

Боготечная звезда явился еси во Асии, отшед в
ню на проповедание Слова Божия, по жребию
тебе падшему, но прежде попусти Господь быти
тебе поглощену в мори, благодать же Божия,
всегда с тобою пребывающая, сохрани тя во
глубинах морских жива и по чотыредесятих
днех, повеле волне морстей вспенившись
извергнути тя на брег, идеже узре тя ученик
твой Прохор, уже оплакивая твою кончину, и
велиим гласом воззва чудодействующему Богу:
Аллилуиа.

Икос 5

Видевше ефесстии жителie преславное чудо,
тобою сотворенное, воскресением отрока Домна,
умерщвленнаго от беса, в бани пребывающаго,
вспеша велегласно силу Бога, тобою им
проповеданнаго, и избавльшеся от поклонения
идолом, взываху тебе сице:

Радуйся, лучами благодати Божия осиянный.

Радуйся, благоухания духовнаго

преисполненный.

Радуйся, во благовестии Христове добре потрудивыйся.

Радуйся, многих приведый к познанию Сына Божия.

Радуйся, помраченныя умом к свету истины призываяй.

Радуйся, веры истинныя громогласный проповедниче.

Радуйся, многобожия тму разоривый.

Радуйся, идолом поклонение угасивый.

Радуйся, непобедимую силу и власть на демоны приемый.

Радуйся, яко мертвых силою Божиею воскрешал еси.

Радуйся, молитвами твоими землю озаривый.

Радуйся, чудесы многими прославленный.

Радуйся, Иоанне Апостоле, наперснике Христов и Богослове.

Кондак 6

Проповедник богоносный слова Божия быв во Ефесе, и усердствуя о благовестии Евангельския истины, подкреплял еси твое учение знаменми страшными и неудобь постигаемыми. Единою бо молитвою разрушил еси капище Артемидино, да зряще сие идолопоклонницы, познают Единого Истинного Бога и воспевают Ему хвалебную песнь: Аллилуиа.

Икос 6

Возсия во Ефесе свет веры Христовы, тобою проповеданныя, егда злочестивый Домитиан воздвиже гонение на христианы, тогда и ты, яко усерднаго исповедника имене Христова, посла епарх в Рим связана, идеже и претерпел еси страшная мучения. Темже мы с любовию память твою чтим и взываем тако:

Радуйся, яко любве ради ко Господу жизни своея не щадил еси.

Радуйся, исповедниче веры во Христа неустрашимый.

Радуйся, идолов и кумиров языческих сокрушивый.

Радуйся, язычников о величии Бога, христианы почитаемаго, уверивый.

Радуйся, правды ради заключение и узы претерпевый.

Радуйся, Христова ради исповедания биенный.

Радуйся, яко чашу смертоноснаго яда невредно испил еси.

Радуйся, в конобе еля кипящаго не сваривыйся.

Радуйся, в лютых мучениях от смерти чудесно спасенный.

Радуйся, кесаря Домитиана и клеветов его сим удививый.

Радуйся, яко свирепство мучителей твоих

победил еси.

Радуйся, слуг диавола посрамивый.

Радуйся, Иоанне Апостоле, наперснике Христов и Богослове.

Кондак 7

Хотя мучитель злочестивый к идолослужению привести тя, Апостоле святой; обаче ты, благодатию Божиею укрепляемь, лютейшия муки претерпел еси и от веры Христовы никакоже отступил еси. Егда же не возмогша нечестивии умертвити тя, тогда возомнив тя бессмертна, в изгнание на остров Патмос осудиша. Ты же, повинуюся промыслу Божию, тако благоволившему, с благодарностию воспевал еси Богу, вся во благая устрояющему: Аллилуиа.

Икос 7

Новая показал еси чудеса идолопоклонником, ища обратити их к спасительней вере Христове, егда плывущу ти во изгнание твое, повелением твоим, отрока утопшаго море на корабль жива изверже, буря укротися, вода сланая в сладкую претворися, воин от чревных язв исцелися, и по пришествии твоём в Патмос, бес пытливый из Аполлонида изгнася. Тогда вси зрящии таковая непостижимая события, прихождаху к познанию Триипостаснаго Бога. Темже ты вси,

яко Апостола Христова, ублажаем тако:

Радуйся, благодатию Святаго Духа напоенный.

Радуйся, светильниче, миру языческому огнем благодати Божия светивый.

Радуйся, яко Господин жатвы призва тя на ниву Свою.

Радуйся, яко в вертограде Того добре потрудился еси.

Радуйся, остров Патмос молитвами твоими освятивый.

Радуйся, великою святынею христианства остров сей утвердивый.

Радуйся, морю и буре повелеваяй.

Радуйся, духов злобы от человек изгоняй.

Радуйся, отроча от потопления морского избавивый.

Радуйся, болезни единым словом исцеляяй.

Радуйся, яко многая люди из тьмы неверия в чудный свет Христов привел еси.

Радуйся, яко и ныне мудрости Христове верных научаеши.

Радуйся, Иоанне Апостоле, наперсниче Христов и Богослове.

Кондак 8

Странно бе видети жрецем аполлонова храма, яко дом того, егоже они безумнии яко Бога почитаху, ты единым словом на землю низпровергл еси: темже чудящися купно и

ярящися на таковое твое дерзновение, идоша к волхву Кинопсу, усердному предстателю бесов, да отмстит поругание их бога. Он же, слеп сый душею, не ведая силы, в тебе обитающия, покушашися мечтании и разными привидении тебе устрашити, и на тя народ подвигнути, но сам окаянный, надеяся на волхвования своя, погрузися в море, и тамо утонул есть, взывая безсильным спасти его бесом, воспрещенным тобою именем Иисуса Христа, Сына Божия, Егоже прослави народ, сего чуда свидетель, воспев: Аллилуиа.

Икос 8

Весь исполнен любви Божественныя, был еси вместилище даров Святаго Духа: будущая прорицающая, отстоящая яко близ сущая открывающая, недужныя исцеляющая, жене анфипатовой, в болезни рождения страждущей, едва в дом ея вступил еси, облегчение даровавый. Приими убо от нас грешных похвалы сицевыя:

Радуйся, велие дерзновение ко Христу Богу стяжавый.

Радуйся, приемый от Него власть на духи нечистыя.

Радуйся, силою Божиею языческое капище разоривый.

Радуйся, язычников в вере истинней утвердивый.

Радуйся, замыслы противников веры разрушивый.

Радуйся, громе, поражаяй древняго змия и его ангелов.

Радуйся, яко коварство лукаваго сатаны изобличил еси.

Радуйся, яко всех верных от козней его защищаеши.

Радуйся, от тьмы неразумия и страстей нас избавляяй.

Радуйся, помощниче всем ищущим спасения и истиннаго просвещения.

Радуйся, в проповедании истины ревность велию явивый.

Радуйся, словеса жизни вечныя нам оставивый.

Радуйся, Иоанне Апостоле, наперсниче Христов и Богослове.

Кондак 9

Всякое беззаконие истребляя ревностно от среды людей, к нимже послан бысть, низпровергл еси единым словом капище бахусово, Нукиана волхва чудесы препрев, из волка соделал еси кроткаго агнца, и привел еси ко Христовой вере, и мать, неистовным разжжением блуднаго греха к сыну, обличив, обратил еси к покаянию, онии же, от греха обратившися ко спасению, немолчно взываху Богу: Аллилуиа.

Икос 9

Витийство любомудрия человеческого не
возможет изреши, ниже ум плотскаго человека
постигнути, еже ты возвестил еси нам о
безначальном бытии Триипостаснаго Бога:
подобно бо Моисею во громех и блистаниих на
горе приял еси от Бога тайну Богословия, и
возгласил еси миру, еже в начале бе Слово, Отцу
искони неразлучное, и всему существующему
виновное, имущее свет жизни вечныя, егоже
тьма не может объяти. Темже почитаем тя, яко
таинника безначальныя Троицы, и воспеваем тя,
яко совершеннейшаго богослова:

Радуйся, сосуде избранный Духа Святаго.

Радуйся, Церкви Христовы украшение и славо.

Радуйся, на высоту богословия возшедый.

Радуйся, Троицу Нераздельну миру
проповедавый.

Радуйся, богословити Отца, и Сына, и Святаго
Духа нас научивый.

Радуйся, Светом Трисолнечным верных
озаривый.

Радуйся, истины Воскресения Христова
громогласный свидетелю.

Радуйся, яко тебе истинному богословию Сам
Бог Слово научил еси.

Радуйся, орле, воспаривый до самого
огнеобразнаго престола Божия.

Радуйся, яко учением Божественным всю подсолнечную напоивый.

Радуйся, образ истинныя мудрости показавый.

Радуйся, любви к Богу и ближнему нас научивый.

Радуйся, Иоанне Апостоле, наперснике Христов и Богослове.

Кондак 10

Спасти хотя души человеческия, всяко поучал еси люди веровати во Христа, Сына Божия, имети совесть незазорну, и любити друг друга, во еже не токмо zde, но и в селениях праведных воспети радостно Всемогущему Богу: Аллилуиа.

Икос 10

Стены горняго Иерусалима узрев во откровении, преподал еси нам проречение того, еже есть, и иматъ быти до скончания мира, открывая нам сие иносказательными словесы, и предоставляя разумети имущим ума божественнаго.

Удивляющеся таковой премудрости, тебе от Бога дарованней, воспеваем тя сие:

Радуйся, зрителю неизреченных Божиих откровений.

Радуйся, познанием Альфы и Омеги превозшедый естество человеческое.

Радуйся, Божия мудрости сокровенное Слово извещавый.

Радуйся, радость неизглаголанную и жизнь вечную миру проповедавый.

Радуйся, богословствующих умов просвещение.

Радуйся, яко и нас к небесному наследию наставил еси.

Радуйся, свеще, пламенем Божественныя любви возжженная.

Радуйся, яко от восток солнца даже до запад хвально имя твое.

Радуйся, власть взати и решити грехи наша от Господа приемый.

Радуйся, служителю таин Христовых.

Радуйся, учением твоим Христа всех Творца возвеличивый.

Радуйся, радости святых еще в жизни сей познавый.

Радуйся, Иоанне Апостоле, наперснике Христов и Богослове.

Кондак 11

Пение, яко жертву благодарну, принесе тебе, святыи Апостоле Иоанне, оный христианин, иже в нищету пришед, и не имый чим воздати долги своим заимодавцем, впаде в отчаяние, и искаше себе насильственною смертию умертвити: но ты, человеколюбив сый, желая избавити того и временныя, и вечныя смерти, крестным знаменiem сено в злато претворив, вручил еси оному убогому, да тем златом и долги отдаст

заимодавцем, и дом свой препитает, Богу же, чрез тебе его благодетельствовавшему, да поет: Аллилуиа.

Икос 11

Светоприемный светильник истинного света был еси, Апостоле Иоанне, во тме многобожия сидящих путеводяй к Истинному Богу. Егда же познал еси приближение времени отшествия своего к возлюбленному Господу, тогда повелел еси учеником твоим погребсти тебе жива, наутрие же пришедше тии ко гробу твоему, и откопавше, ничтоже в нем обретоша, познавше убо, яко благословением Божиим совершися сие чудо, и воспеша тебе тако:

Радуйся, яко солнце в добродетелех просиявый.

Радуйся, свято жизнь земную скончавый.

Радуйся, во славе от земли на Небо преселивыйся.

Радуйся, от Царя Небеснаго венец бессмертия приемый.

Радуйся, светом вечным на Небеси осиянный.

Радуйся, яко и нас благодатным светом просвещаеши.

Радуйся, звездо пресветлая, всех приводящая к Солнцу Правды Христу.

Радуйся, светильниче, мрак душ наших любовью озаряй.

Радуйся, по обетованию благаго Учителя твоего

возседый на едином от дванадесяти престолов.
Радуйся, творый на оном суд и правду посреде
людей Божиих Израиля.

Радуйся, дивный наставниче всех ищущих
спасения.

Радуйся, яко фимиам молитв твоих о всем мире
христианством приносиши Христу Богу.

Радуйся, Иоанне Апостоле, наперсниче Христов
и Богослове.

Кондак 12

Благодать дана бысть от Бога месту тому, идеже
тело твое земли предано бяше, да испускает в
день погребения твоего тонкий прах на
исцеление болящим, показующе сим чудом,
како прославляет Бог любящия Его, да вси,
зряще сие, непрестанно сердцем и душою во дни
и в ночи вопием Ему: Аллилуиа.

Икос 12

Поюще труды твоя во апостольстве и чудеса и
исцеления, яже источал еси, и источаеши
благодатию Духа Святаго, в тебе обитающего,
восхваляем Бога, даровавшего нам такового
путеводителя, наставляющего нас на путь
спасения, и милосердствующаго о нас, грешных.
Приими убо от нас, святыи Апостоле, похвалы
сицевыя:

Радуйся, священнаго лика апостольскаго

сопричастниче.

Радуйся, Церкви Христовы неугасимый
свещильниче.

Радуйся, яко с тобою Ангели ликуют на Небеси.

Радуйся, яко человецы с любовию восхваляют тя
на земли.

Радуйся, всех христиан великое утешение.

Радуйся, яко многи храмы и обители имене
твоего незримо охраняеши.

Радуйся, православными людьми российскими
возлюбленный.

Радуйся, о стране и народе нашем пред Богом и
Пресвятою Богородицею ходатаю теплый.

Радуйся, любящим и чтущим тя любовию
святою воздаваяй.

Радуйся, всещедрый о нас предстателю.

Радуйся, яко Преподобную Матерь
Господа ходатайствовать о нас, грешных,
преклоняеши.

Радуйся, яко предстательством твоим у Христа
Бога вечное спасение нам подаеши.

Радуйся, Иоанне Апостоле, наперсниче Христов
и Богослове.

Кондак 13

О преславный и всехвальный Апостоле и
Евангелисте, наперсниче Христов,
возлюбленный Иоанне, благоприятным твоим и
всесильным ходатайством ко всеблаговому Твоему

Учителю и нашему Владыце и Господу избави нас от всяких бед, скорбей и болезней, испроси нам вся благая временная и вечная, и христианскую кончину живота нашего, да с тобою на Небеси со Ангельскими лики и всеми святыми воспоем Богу: Аллилуиа.

Этот Кондак читается трижды, затем 1-й Икос: «Ангел предстатель...» и 1-й Кондак: «Ангельских сил...»

Молитва

О великий Апостоле, Евангелисте громогласный, Богослове изящнейший, тайновидче непостижимых откровений, девственниче и возлюбленный наперснике Христов Иоанне! Приими с свойственным тебе милосердием нас, грешных, прибегающих под твое сильное заступление и покровительство! Испроси у всещедрого Человеколюбца Христа и Бога нашего, Иже пред очесы твоими изливал есть Кровь Свою дражайшую за нас, непотребных рабов Своих, да не помянет беззаконий наших, но да помилует нас, и да сотворит с нами по милости Своей: да дарует нам здравие душевное и телесное, всякое благоденствие и изобилие, научая нас обращати вся она в славу Его, Творца, Спасителя и Бога нашего. По кончине же временная жизни наша да избегнем мы, святой Апостоле, немилосердных истязаний, на

воздушных мытарствах нас ожидающих, но да достигнем под твоим руководством и покровительством горняго онаго Иерусалима, егоже славу во откровении ты зрел еси, а ныне наслаждаешься оныя радости, обещанныя избранным Божиим.

О великий Иоанне, сохрани вся грады и страны христианския, град сей, весь сию, храм сей, посвященный святому Твоему имени, служащих и молящихся в нем, от глада, губительства, труса и потопа, огня, меча, нашествия иноплеменных и междоусобныя брани, избави от всякия беды и напасти, и молитвами твоими отврати от нас праведный гнев Божий, и испроси нам Его милосердие.

О великий и непостижимый Боже, Альфо и Омега, источниче наша веры! Се на умоление Тебе предлагаем святаго Иоанна, егоже Сам сподобил еси познати Тебе, неисповедимаго Бога, в неизреченном откровении. Приими его о нас к Тебе ходатайство, даруй нам исполнение прошений наших, во славу Твою, а паче всего соверши нас духовным совершенством, к наслаждению жизни некончаемая, в небесных Твоих обителях.

О небесный Отче, создавый вся Владыко, Душе духов, всесильный Царю! Коснися перстом Твоим сердец наших, да растаявше, яко воск,

пролиются пред Тобою, и брeнная тварь духовна
сотворится, в честь и славу Отца, и Сына, и
Святаго Духа, аминь.

